

Avertura dal nov tunnel da viafier dal Gottard

La festa d'avertura per 100 000 persunas ha lieu il cumenzament da zercladur 2016

■ (mc) L'avertura dal nov tunnel da viafier dal Gottard tranter Erstfeld (UR) e Bodio (TI) ha lieu il 1. da zercladur da quest onn. 20 emnas avant l'avertura quintan ils organisaturs da la festa d'avertura cun in grond interess da la populaziun. Els quintan che radund 100 000 persunas nizzegian l'ocasiun da transitar ils 4 e 5 da zercladur il tunnel da 57 kilometers lunghezza. L'avertura dal pli lung tunnel da viafier dal mund duai era vegnir festivada commensuradamain, ha declerà *Gregor Saladin* da l'Uffizi federal da traffic stersas ad Altdorf. Il cusseglier guvernativ da l'Uri *Urban Camenzind* ha secundà, menziunond ch'el saja in zichel losch che ses chantun possa contribuir insatge a quela impurtanta colliaziun internaziunala dal nord al sid.

L'avertura uffiziala dal nov tunnel da basa che maina dad Erstfeld a Bodio ha lieu il 1. da zercladur. I sa tractia d'in arranschament exclusiv per 1200 giasts da tuttas duas varts dal Gottard, ha tradi Saladin. Preschents vegnan er ad esser il cussegl federal en corpore, las commembras ed ils commembers dal parlament federal, schefs da stadi e renga dallas tiaras vischinas, ils ministers da traffic sco era passa 300 schurnalists. Tranter auter vegn purschi in'inscenaziun d'avertura da *Volker Hesse*.

Damai che la realisaziun dal tunnel è vegnida decidida en ina votaziun dal pievel duai dentant era la populaziun pudair assister a l'emprim viadi tras il tunnel. Totalmain èn 140 000 persunas gia s'annunziadas, trais giadas dapli che spetgà. Tras la sort vulan ins la finala eruir 500 persunas e metter a disposi-



Suenter l'avertura vegnan 260 trens da vitgira e 65 trens da persunas a transitar di per di il nov tunnel da basa dal Gottard.

MAD

ziun 100 bigliets. La fin da schaner è l'ultim termin d'annunzia.

En il tract da 20 minutas

Ils organisaturs da las festivitads d'avertura dal Gottardo 2016 quintan sin fundament dal grond interess per ils trens d'avertura era cun ina gronda participaziun als dis dal publicum che èn fixads sin ils 4 e 5 da zercladur. Durant quests dis vegnan ulteriuras 100 000 persunas ad obtegnair la pussaivladad

da viajar tras il tunnel da basa e da returnar sur il vegl traject da la ruta da muntogna. Planisà e da laschar circular trens da shuttle en il tact da 20 minutas. Ils bigliets spezials vegnan ad esser en vendita a partir da l'avrigl.

Al publicum duai dentant vegnir purschi dapli che in viadi cun il tren tras il nov tunnel. Il parlament chantunal da l'Uri metta a disposiziun 500 000 francs per las festivitads d'avertura. Vidlonder vegnan differents arranschaments cul-

turalis che vegnan finanziads ord autras funtaunas. La confederaziun ha prevì d'investar nov milliuns en las festivitads d'avertura. Questa summa vegnia impundida cunzunt per l'act festiv cun ils giasts dal stadi e per la segirtad. Ultra da quai datti daners da sponsoradi.

En il chantun Uri vegn festivà en dus lieus da festa che vegnan colliads cun bus da shuttle e quai ad Erstfeld e Rynächt. En il center da las festivitads stat ina tenda en furma da dom. En questa

tenda sa chatta ina reconstrucziun dal «crap dal diavel» che vegn er utilisà sco plattafurma da projecziun. Il chantun Uri veglia nizzegiar las festivitads d'avertura per sa preschentar al mund, ha declerà cusseglier guvernativ Camenzind.

Ultra da quai en previds divers arranschaments culturals che sa repartan sin l'entir onn 2016. Tranter auter er ina primadiziun dad in musical da *Michel Roth* che sa basa sin il roman dal Gottard «Die künstliche Mutter» da Hermann Burger che vegn dada durant la stad en il rom dal Festival da Lucerna.

Festa per ils planisaders e miniers

Tranter l'act d'avertura ed ils dus dis da festa per la populaziun ha lieu ils 2 da zercladur in quart di da festa. Quel è reservà per tut quels che èn stads involvids tar la planisaziun e realisaziun dal project. Ins quinta cun radund 2000 giasts.

Gronda atenziun vegn attribui durant las festivitads d'avertura a la segirezza. Sper las polizias chantunals da l'Uri e dal Tessin èn er il Servetsch da segirezza da la confederaziun, il Servetsch federal da novitads, ils servetschs da salvament sco era l'armada involvids. Durant l'act d'avertura vegn il traffic da rauba sin l'ischel dal Gottard interrutta temporarmain. Era la via chantunala tranter Erstfeld ed Altdorf vegn ad esser serrada. La A12 resta dentant averta.

Festivà vegn er ad Erstfeld. Il president communal *Werner Zraggen* ha orientà ch'i dettia ina festa dal vitg, dentant er in'exposiziun davart Erstfeld che è sa sviluppà dad in pitschen vitg da purs tar in vitg d'employads da viafier cun blers fulasters.